



## **MOCIÓN DE CLAUSULADO SOCIAL E TRANSPARENCIA NA CONTRATACIÓN PÚBLICA .**

### **EXPOSICIÓN DE MOTIVOS**

As institucións públicas son, de facto, un axente dinamizador da economía, ben a través da regulación da mesma, ben a través das súas potestades de intervención.

Entre as súas potestades, a contratación pública debe ser considerada como unha ferramenta para o cumprimento e realización de políticas públicas, execución de obras ou prestación de servizos, pero tamén unha maneira de realizar intervención social.

A intervención social das institucións vincúlase á defensa dos máis elementais dereitos da cidadanía e esa circunstancia pode e debe estenderse tamén aos dereitos laborais, económicos e medioambientais.

Nun momento histórico de especial depauperación dos dereitos socioeconómicos, dos dereitos laborais, de enorme degradación medioambiental e de aumento das desigualdades materiais, pero tamén entre mulleres e homes, faise urxente que as institucións fagan valer a súa notable influencia sobre as relacións laborais e económicas.

Os pregos de contratación da Deputación Provincial da Coruña deben recoller criterios de valoración e condicións especiais de execución de contrato referidas ás seguintes consideracións:

- Sociais: Cumprimento polas adxudicatarias das condicións laborais estipuladas pola lei e aplicación do convenio colectivo correspondente, así como a incorporación de criterios de valoración/adxudicación que aposten polo emprego estable (indefinido) e a inclusión nos Pregos de cláusulas que garanten a exclusión de ofertas licitadoras que se sitúen por baixo dos mínimos legais ou convencionais pactados.
- Ambientais: Inclusión de clausulado referido ás condicións medioambientais e de xestión de residuos e utilización eficiente de enerxía.
- Igualdade de xénero: Inclusión de clausulado e condicións de execución do contrato referido ás garantías por parte das adxudicatarias de igualdade de trato en canto ás oportunidades no acceso ao emprego, permanencia, salarial e de clasificación profesional entre homes e mulleres. Así como o favorecemento de medidas de conciliación entre a vida persoal e laboral.



- Inclusión social: Compromisos de contratación por parte das adxudicatarias dos sectores máis desfavorecidos en canto a inserción no mercado laboral: mocidade, emigrantes e persoas con diversidade funcional.
- Comercio xusto. Aposta nos pregos de contratación por criterios de adxudicación e condicións de execución do contrato, de fomento do comercio xusto, debidamente garantido e acreditado.

A inclusión de cláusulas con tal finalidade deberá ser de aplicación obrigatoria a todos os expedientes de contratación, sempre que o permita a súa natureza e obxecto, garantindo que, cando menos, o 20% da puntuación final sexa o resultado da aplicación de dito clausulado.

A aposta polo procedemento aberto e a consideración residual e extraordinaria (e precisada de especial xustificación acreditada) do negociado, debe ser criterio xeral de aplicación desta Administración, non só para garantir unha maior transparencia e pluralidade de licitadoras senon tamén para garantir unas mellores condicións (económicas, mais tamén sociais) na contratación pública.

Por todo isto sométese á consideración do Pleno desta Corporación Provincial a adopción do seguinte

### **ACORDO**

**PRIMEIRO.-** O Pleno da Corporación insta á Presidencia e á Xunta de Goberno a:

1.- Aprobación, no prazo máximo dun mes, dunha Instrución de Clausulado social na contratación pública desta Corporación, de conformidade co contido e criterios da exposición de motivos deste acordo, de xeito que entren en vigor unha vez publicada no BOP.

2.- Redacción, no prazo máximo dun mes, de proposta de novos Pregos-Tipo de contratación, con inclusión de clausulado social, e a súa incorporación ás Bases dos distintos Plans municipais (Plan de Acción Social, Plan de Obras e Servizos, etc), debendo someterse á aprobación deste Pleno para que poidan entrar en vigor o 1 de xaneiro de 2016.

3.- Utilización preferente do procedemento aberto nos expedientes de contratación desta



Corporación, acudindo ao negociado só con carácter excepcional, extraordinario e coa debida xustificación acreditada no expediente.

SEGUNDO. - A Mesa de Contratación da Deputación Provincial da Coruña será competente para o seguimento do cumprimento do presente acordo. A tal efecto a Presidencia remitirá trimestralmente un informe ao respecto, do cal tamén se lle dará traslado a este Pleno.